

四庫全書

集部

欽定四庫全書

集部

閒居叢稿

目錄
卷一
一至

詳校官編修臣錢 樾

侍讀臣孫球覆勘

覆校官中書臣汪學金

校對官中書臣潘奕雋

謄錄監生臣莊承簪

欽定四庫全書

集部五

閒居叢稿

別集類四元

提要

臣等謹案閒居叢稿二十六卷元蒲道源撰道源字得之號順齋世居眉州之青神徙居興元初為郡學正罷歸皇慶中徵為國史院編修官進國子博士年六十矣越歲復引疾去後十年召為陝西儒學提舉不就迹其生

平恬於仕宦大抵間居之日為多故其子機
衷輯遺文題曰間居叢稿凡詩賦八卷雜文
樂府十八卷詩文俱平實顯易不尚華藻黃
潛為之序稱國家統一海宇士俗醇美一時
鴻生碩儒所為文皆雄深渾厚而無靡麗之
習承平滋久風流未墜皇慶延祐間公以性
理之學施於臺閣之文譬如良金美玉不假
鍛鍊琬琢而光耀自不掩云云亦言其文之

真樸也蓋元大德以後亦如明宣德正統以
後其文大抵雍容不迫淺顯不支雖流弊所
滋庸沓在所不免而不謂之盛時則不可顧
嗣立元詩選引潛此文謂當時風尚如此可
以觀世運焉斯言允矣乾隆四十一年二月
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

經

提要

三

欽定四庫全書

集部五

閑居叢稿

別集類四
元

目錄

卷一

古賦

四言古詩

五言古詩

卷二

七言古詩

雜言

卷三

五言律詩

卷四

七言律詩上

卷五

七言律詩中

卷六

七言律詩下

卷七

四言絕句

五言絕句

六言絕句

七言絕句上

卷八

目錄
七言絕句下

卷九

銘

箴

贊

解

辯

樂語

壽詞

春帖

疏

卷十

跋

卷十一

齋醮文

祝詞

節辰致語

上梁文

詩聯

卷十二

樂府

卷十三

經旨

策

卷十四

傳

記

卷十五

制

表牋

卷十六

碑

卷十七

書

啟

卷十八

序上

卷十九

序中

卷二十

序下

卷二十一

字說

卷二十二

祝文

卷二十三

祭文

哀辭

卷二十四

墓誌銘上

卷二十五

墓誌銘下

墓表

卷二十六

行狀

欽定四庫全書卷

閑居叢稿卷一

元 蒲道源 撰

古賦

雪軒賦

并序

延祐四年余與牛君楚臣同官于翰林國史院始獲相
識君京師人宰相知其賢而有文以白衣辟用授國史
院編修官未幾求去余私謂從君遊者檢閱宋文郁曰
第語牛先生云今司文柄者徒欲得君之賢以為此職

非責以朝夕奔走期會姑少留得俸金以給饘粥可乎
文郁以告君曰蒲之意甚厚然吾以早衰不能勉強非
不樂此職也但食人之食而不事其事吾不為也遂決
辭余聞之深有愧其言暨余承乏國學君使人持雪軒
卷求余序引余竊思君之取義於雪其必有深意焉今
試以君平昔觀之則夫雪之皓然一色皎而不污者庸
非君之潔乎其掩穢覆瑕者庸非君之有容乎其倏然
而集忽爾而釋與時變化者庸非君之出處乎若夫為

稜楚之瑞則君之孜孜講學以善及人者可知矣至如
天葩繽紛匪雕匪刻作止疎密飛舞之態而其文章之
妙天機所到非有意而為之者似焉宜君之以雪名軒
而識者亦以為然也向所謂賢而有文與其翻然而去
不以窮達累其心者於茲而益信噫君子樂道人之善
而欲播于歌詠者觀此有以識其大方云既以為之序
又從而賦之

牛君楚臣以雪名軒太常陳子悉著于篇而又徵文于

余也余掇取陳子之所棄者以為言方其玄冥用事白
晝將夕巖風乍止同雲全集天花散墜彌望如一飄然
而入吾之戶忽爾而縞吾之室余乃掩關退處蟄坏其
居蕭蕭騷騷鳴吾竹牕之紙皎皎潔潔映吾棊几之書
恍虛白之漸生渺俗慮之絕無當此時也或倚蒲團以
聽其聲或據槁梧以觀其色神魂灑然而昭蘇肝膽以
之而瑩徹如生乎鴻濛之世與澆風之懸隔如獨立萬
物之表脫垢氛而超邈此伯夷采薇於西山求仁而有

得而顏子躬四勿之訓已私之盡克之時也歟噫微斯人而與言啜茗飲以冲默

四言古詩

贈宗石泉相士

石以為甃泉居其中塵滓莫染滄瀄涵空粵有道人瞭然雙瞳覽物無遁與泉則同氣色顯晦骨相窮通我亦何心爾賦斯容挾術見訪奈予已翁水落石出一笑相逢

五言古詩

送鄧明仲之察司書吏

鄧生鄉曲英行業雅修整遇事膽輪困折衷言骨鯁匹
馬走京師載筆上臺省續玉正求沽囊錐初脫穎相
望五千里寄聲問幽屏去秋鮮鞍馬過我情味永誰知
離別久復此遊從幸一朝忽徵詩遽以行期請云承憲
司檄欲往親簿領青雲有餘地白日無停景滿意取功
名歸來娛定省

張教授盆池石山種梅

曲江安靜退閉門但却掃精心砭砢餘頗復事幽討嶮
崑一拳石愛惜如至寶種梅於其巔硤确費天巧慙慙
十二冬要看花實好傍人笑我癡我意真自保南枝冰
的皪今果慰懷抱無勞歎春遲似比蟠桃早吾聞橘中
樂不減商山皓况此大觀中覲面即蓬島何須窮弱水
墊沒死枯槁持酒壽先生一醉洗衰老

次王仲禮九日感懷韻

佳節成虛擲，悵如損百金。秋菊夕可食，徒為楚騷吟。獨
有淵明家，足以供幽尋。淵明家所愛，興同無古今。眼
中人豈乏，然各懷其心。所以子期沒，伯牙應輟琴。東籬
景依舊，白衣奚再臨。無酒須謀賒，滌此塵埃襟。誰能起
廢會，庶令朋盍簪。

九月十五日李子文席上佳節若為酬，分韻得
節若

書生時時愁富家，日日節乘此閒暇。時不飲，何怡悅。樽

前三四友年少文愈傑新詩落筆成句句皆清絕酒來
不須辭要使頰吾頰

菊節過六日友人邀小酌我時適無事來意已不卻賓
主情況熟笑談應自若欣然具有核不豐亦不約沿溪
共徘徊秋景正蕭索留連興未闌野鴉啼日落

逸題

馭駃千里心奔馳追電掣一朝羈維中不能前跛鼈士
生天地間出語比稷契豈知與世謬舉足便差跌當途

爛羊封空谷白駒潔胡弗事諂苦自完氣節曲肱陋
巷貧炙手權門熱行藏道所係去取今已決倘佯復何
為歌詠自怡悅惟知詩語工遑恤生涯拙

閑居紀事二首

客從長安回敘濶訪鄰里貌悴於去時因而問所以客
悲向我言此行幸脫死長安遭飢荒食盡到糠粃升合
貴不貲珠金何足恃凌晨出求糴于于如櫛比暮歸持
空囊菜色皆相似老弱困且羸行隨墻壁倚邨墟向昏

黑剽掠羣兇起咸云田中麥苗枯無雨水今年如弗收
炊爨當易子子聞重歎嗟禍及乃至此八政食為先周
書寓微旨天下苟有飢糶思若由已梁惠戰國時民粟
知移徙一夫不獲所古人心愧耻如何填溝壑遽忍立
而視此邦麤偷生唇亡寒及齒嗷嗷食口衆身不親耒
耜今朝聽此言徒增驚悸耳

古人制昏禮所貴在人倫冠笄年既邁受幣方交親後
世雖偷薄十中五猶遵如何至今日彛典俱湮淪男癡

已合配女幼皆成姻安知慮天壽奚暇占吉辰媒妁走
市井鼓吹喧城闔百年祇倉卒大事為因循問之何遽
然詔云選佳人傳聞至太甚意失非本真正道難化俗
訛言易惑民於初苟不慎其末弊將臻寄聲秉釣者風
俗何時淳

送齊府判北行

北風天欲雪欵樞君話別袖出諸公篇意不容我缺蹇
余適丁艱離况轉悲咽情深詎可辭政美難悉說君才

信更練民瘼亦究徹正論當風霜始怒終見悅侯邦居
未僚用未盡施設頗聞求閑局此行計已決謀此行云
善許國奚自潔况今訪落初求治正急切肯將棟梁具
小用為扈楔秉鈞方得人此語宜中節

送府史竇彥立遷奉元

藹藹府中英夫誰可屈指竇君長安人衆論共推美氣
和更敏才志銳方壯齒留曾無芥蒂出語有綱紀一朝
過我辭試問其所以廟堂新立法為吏互遷徙簡書迫

程期信宿不容止門當道途旁所幸還鄉里聞之心惘
然別緒紛莫理一杯送歸鞵一言贈吾子人生重名節
不義深可恥青雲路雖高欲致由踐履去去宜勉旃好
音行洗耳

次德衡弟韻五首

古道不可作轉覺澆風長人心所去就但與時炎涼燕
石藏十襲連城遺路傍汝賢乃迂濶汝直成狂佯世味
鼎一臠人爭染指嘗伊我澹無慮簞瓢身世忘處污奚

害潔視變皆為常彼哉聲利徒末路空皇皇

羲和破凜冽可愛固其宜晨興盥漱罷茅簷與相期晴
光亂錦繡口有難言詩溫然寓天理令人蕩邪思苦恨
白晝短忽忽光陰移冬者歲之餘為學當及時禮樂三
千字他年對丹墀

萬物長養極歸根以成冬四時只如此鬱鬱南山松猶
人內主敬外貌嚴而恭肯隨桃李花嬌靚為君容澗壑
老不悔工師非願逢

用心欲剛明為學貴專靜人之不已知於吾奚所病風
月自清閑篇章足歌詠鐘鼎與山林從來各天性其肯
枉尺尋獲罪於前聖著龜無庸決去取予能定

古人進道心如水朝東勢滔滔晝夜間欲已而不已明
德與新民顛沛必于是吁嗟朱子沒道統誰能嗣年馳
志弗立豈不增驚悸學而徒為人固非分內事區區斗
筭才恃彼詞鋒利

簡德衡弟戒飲

人生有秉彛尤物害之極麴蘖本致和為禍亦云劇夏
后防其源遂見踈儀狄周公戒淫酒作誥何諄悉大則
國政隳小則家業失甚則遭戮辱否則成痼疾書傳之
所載歷歷記疇昔如何後來者乃循覆車迹吾弟頗涉
獵豈不增夕惕憶余自童幼杯杓素所嫉無何人強勉
頗亦開涓滴當其下喉時惡藥與沙礫方知醕酏中特
賴扶持力苟若輕放肆野馬恣奔逸聞汝以此戒令我
喜折屐雖能勇于始其末烏可必莫學醉伯倫婦言非

所恤

餞杜仲正經歷美解東歸

脫屣蘭省掾曳裾蓮幕賓
曾中自水鏡筆底皆陽春
面無喜愠色口不臧否人
餘事及文翰出語清絕塵
佳篇屢貽我玉唾光猶新
寒齋坐移晷傾寫見情真
瓜期遽云代歸意浩無垠
渺渺關山路皚皚霜雪晨
留之不肯住握手但酸辛
後會知何時別離宜自珍

題竹雀圖

昔聞丹穴雛棲梧而食竹要看五色羽輝映森森玉歲
晚不一逢黃雀乃見辱此君初無心汝得暫棲宿

壽甫教授徵余文漫成二首

人生天地間分定不可移得亦胡為喜失亦胡為悲我
今兩俱置順適了無疑惟餘樂善心蚤夜以孳孳
我本空疎人虛名謾驚俗外誇實未充內省恒自慙已
然知奈何勤學補不足庶用期寡過慕榮非所欲

贈雪梅相者

天爵人不脩妄意希富貴縱然貌可取其中復何謂道
人慎許可更當窮本原子游裴行儉子乃無間言

贈月軒日者

月軒挾術游言論非剽竊星筭相命書一理皆貫徹為
人推禍福脗若合符節豈比浮誇徒枯中但饒舌

寄太子賓客王山木

公昔解郡紱漢中久盤桓江山發令姿草木有榮觀逸
興超物表清辭落毫端而予等燕雀何幸隨鳳鸞閑居

侍函大議論驚層瀾或時舉玉趾乘興看藥欄優哉聊
卒歲俯仰天地寬胡為召檄至去住處尤難義有不可
辭促裝對金鑿儲君得正士學問資甘盤固知神明相
獲遂寢食安恨無飛仙藥使我生羽翰一往見顏色晨
昏奉清歡

題田氏壽母詩卷

啜菽胡可樂列鼎胡可悲蓋以親為心貧富安足移田
君偉男子母老鶴髮垂立身掾冬官祿養諧心期金卮

獻壽社綵服為兒嬉慈顏自怡悅堂上春熙熙八秩又
四稔康寧殊未衰晚福方川增會當慶期願

題袁氏忍恕堂

袁氏敬華構而以忍恕名求詩發其義為子且細評治
家苟不忍觸事成乖爭待人苟不恕施舍違常情癡聾
可作翁和順無操兵立心務寬綽絜矩皆方平同族歡
弗間在邦怨奚生勗哉事斯語千古垂芳聲

陝州盧知事服闋從仕

忠孝欲俱立在人良亦難歸養失妻質出仕曠問安進
退求一可重輕察兩端見危當致命處常易休官盧君
佐戎幕陟岵時長歎豈以升斗祿而忘菽水歡挂冠奉
甘旨具衣適燠寒愛日既云久號天復吞酸終制始從
調國光再來觀識面詢所履敢為武弁看資爾事父敬
葵傾寸心丹庶完終始節令名垂不刊

額森持穆爾承旨先塋樹碑

堂堂開府公接士如不及天教長詞林聲譽何洋溢收

羅得英彥燦若瑚璉質載筆登鑿坡贊助誠有益念切
知己報此身寧自惜矧茲武穆王帝室勲業爰詔許樹
豐碑文章爛星日君行從所主光彩動鄉邑便私非素
心相事無遺力歲晚期旆還扶搖看搏翼

題泣麟圖

孔子不得位麟出非其時感而作春秋絕筆亦在茲拭
面固無取心亦含深悲麟名自此著聖為百世師彼皆
草木腐此獨日星垂仰德罄終古不泯惟民彝

萱春堂

寸草至微物發生待春暉惟人有此身豈不感慈闈育
我顧復我須臾無暫違教誨至成立獲此食與衣罔極
恩難報竭力猶庶幾三復郊也句餘情重依依緋衣兩
昆季純孝知所希有賴憲幕賢扁堂乃發揮令我撫卷
歎遙瞻白雲飛噫歟微斯人吾誰與同歸

題雍氏通玄類證續編

為醫本濟世不善或費人弗學亦云已學則窮本真有

生羅衆疾傷寒最危身陰陽及虛實務要識所因毫釐
少差失生死分夕晨雍君業難素授若岐黃親類證著
續編張門有忠臣百問指諸掌條理細敷陳刊之使行
世信無夭折民斯人用心溥奚問越與秦始知天地間
通貫乃為仁撫卷重歎息我志何時伸

送翰林沙知印之武州倅

沙君西域英言動安且詳久矣被推擇登茲白玉堂日
與羣彥集職恭持印章年滿當補外五馬分輝光豈惟

我志得要覩斯民康異時樹風猷無愧漢循良

題何氏孝友義士詩卷

人生天地間萬殊一本原由親洎疎遠施有隆殺恩我
觀曹溪何袞袞來慶源相承盡積德仁念心所根四世
弗異爨一家無間言孝養厥父母友愛于弟昆波及顛
連者為義勇勝賁平糴救荒歉出貲周嫁婚黔教食餓
者翳桑命能存病藥死給櫬衆善難具論餘力守仙釋
並列孔聖尊上表祝釐懇敢隨俗趨奔聲名達淵聰褒

詔如春溫彼哉嗜利徒欲蔽靈臺昏既自厚封植復思窮并吞私吝守愈固豈思同化元題詩重歎息不覺辭已繁要期引勿替傳之子若孫

題林氏義井詩卷

寒泉天一生苦惡其性死譬諸人之身涕汗棄物耳惟餘玉池液漱嚥內充美海濱斥鹵田醴司所經紀民聚井味惡遠汲汗流泚林君丞于斯人渴視猶已積誠致懇祈濬地泉湧起冽寒異尋常烹飪倍甘旨捐金具埽

甃砌甃護崩圯綆罌四駢集老稚悉驚喜滿慰塵土心
挹彼仍注此昔君因歲荒施粟救鄉里乃今興惠利陰
德重積累既收勿幕功名記千百祀

題僧石隱詩卷

道本費而隱似無乃真實放則彌六合卷則退藏密求
其所以然了不見形迹師從讀書來此理諒能識身行
京塵中名隱聊自適天地如許寬豈求石罅隙虫人莫
說夢不必深致詰

題許魯齋慰狄子昭亡子書

聖學繼者誰本朝許文正說說門人中修短孰非命向
來慰亡書今日深起敬細觀遺翰墨滿紙皆情性

送逸姓氏還奉元

憶昔寓京日所接罕可人哀然有奇士充賦來西秦金
鍼五色線黼黻期補紉知者喜收錄如磬獲泗濱當年
行輩中齒髮尤青春天馬不受羈海犀能辟塵九載此
重覩喜色含津津贈我移蘭篇辭翰俱足珍臭味既云

同千里猶比隣還歸有公論主人方肅賓

謝蔡叅政惠寄甘州枸杞

來自酒泉郡殷紅色尚新去家不食此遠寄住家人住
家人老矣獨愛芳甘味欣然親解包咀嚼感珍惠

春晚山茶始開示德衡弟

山茶本冬花憔悴遂開晚儕輩鬪芬芳已獨尚息偃及
茲春事深渥丹始赫烜叅列姚魏前正色無婉婉因之
觀我生平昔匪驕蹇衡門自棲遲臨老遇摧挽朱紫皆

少年跡親心自遠華顛豈懷榮田里幸得返功名船上
灘歲月輪下坂撫樹三歎息歲寒同繾綣

壬戌五月一日題所贈扇

小惠乃人為等此一扇材大德天地功及物無邊涯搖
時熱暫去停手熱還來早晚秋風至洒然心目開

為扇解嘲次前韻

朱明天地爐得此解愠材知君力所及如我生有涯但
當錄小善勿遽期方來勗爾竹帛功相茲橐籥開

菊攔邊金錢盛開

黃菊未開時金錢為前驅顏色頗同調節操乃爾殊地
產富百鎰天質成五銖鮮明宜露洗黯淡愁霜枯芳姿
甚可愛藥品時亦須連茹多或厭滋蔓久難圖不以時
消沸恐隨凡草俱體弱雖自植頭重還相扶

閑居叢稿卷一

欽定四庫全書卷

閑居叢稿卷二

元 蒲道源 撰

七言古詩

為西軒先生賦冬日葵花 并引

丁亥歲十月西軒先生園中葵花忽開諸君子皆有詩
愚謂葵雖凡卉然詩人尚其有傾日之義且常開于盛
夏今反見于冬何耶抑亦為主人負堯舜君民之志而
處於幽閑之地其畎畝不忘之意未始少衰為發此祥

或庶幾其理可得而推也因為詩以獻諸先生且以識一時之事云

飛霜萬瓦方皚皚西園蜀葵何為開余愛此花當盛夏
滿眼旌節森亭臺芳心見日常傾向依依有類朝君狀
古來風雅託草木屢遣詩人勞意匠窮陰閉塞成嚴冬
忽驚散火冰雪中世間萬物凍欲死獨許凝笑依牆東
旁人省見皆咨愕余將以理解其惑西軒先生花主人
此祥有為非虛得主人抱負經濟才合居鼎鼐調鹽梅

祇今白髮置散地淪彼伊洛傳將來樂天知命年七十
豈以用舍為憂懌惟餘堯舜君民心至老不衰猶宿昔
對花洗盞壽先生先生有意須當傾愚雖不敏亦非諂
作詩聊頌肺肝情

賀白良甫兵後再聚

并引

白良甫子善卿兵後四十年死生契濶今復再聚作詩
以賀并餞善卿之行善卿家屬在忠州欲先挈之錦城
然後迎其父為菟裘之計

香山先生已華顛老去無兒真可憐一朝有客拜牀前
顧之不識誰使然慙慙欲語聲哽噎眼睫淚迸如流泉
忍悲細為剖根原自昔普疑飛兵烟子南父北各分散
屈指經過四十年但知骨肉成死別豈意今日皆生全
我初聞之玉堂仙撫膺擊節宵不眠鄧攸陰德竟無報
仲孺遺體知有緣趨庭詩禮絕復傳事出意表寧非天
問君忠州盍言還云挈妻孥錦水邊迎我雙親歸老焉
甘旨奉養俱團圓感君純孝真可賢終始更願心常堅

因合墨卿書之牋會有三嘆讀此篇

送周羽士

仙翁出塵貌竒古紫陽真人應乃祖功德方升居下土
亦知上界多官府神遊八極隘崆峒一雙青鳧翔漢中
玄都笑指心忽忽萬里還隨鶴駕風

仲春十三日大風雪

兩日東風何作惡橫將桃李花吹落陽和欸忽變寒威
曉來陡覺春衫薄紛紛撲面飛蟲亂細看六花驚雪作

須臾眼界失舊觀玉殿瓊林起沙漠細思節物恐差謬
始信化工難測度初遷喬木悔新鶯久屈重泉愁尺蠖
仰天致詰不我酬運會果誰司橐籥便當努力戰客陰
一掃晴空開六幕

與漢中道尚書吏

古人世利莫能誘千駟萬鍾不屑受至今凜然有生氣
名字烜赫垂星斗彼雖富貴德匪稱一死真同草木朽
尚君結髮從簿書妙選已居風憲久持身信若璧無瑕

遇事何妨衣浣垢，竭來漢中兩見之。循視初終自揀守，
願言此去加勉旃。仰止前賢期尚友。

題南褒草亭圖手卷

并序

褒邑之東宮曰玉虛，旁有溪園，地形爽塏，仲巖道錄取
乾坤一草亭語，意誅茅構其上。西鄉令綱齋先生李進
臣為寫此圖，大尹山木公及名士品題成巨軸，故并及
之。

君知上界足官府，故葺衡茅在江滸。離喧氣象接鴻濛，

昭儉規模存簡古玉虛連延清境同勝地雅屬臞仙主
東西日月自縈繞高下乾坤時仰俯晚山蒼翠鳥知還
秋水空明魚可數沉香富貴走太白浣花岑寂留工部
神游八極初不羈稅駕聊須憇茲宇絳齋一見心目舒
老筆淋漓注風雨流傳文士爭品題短韻長篇聯繡組
牛腰詩卷固不惡尚惜竒觀墮塵土

送廖通判亨甫解職歸秦

廖君雖曰黃冠流頽然特出衆罕倚踐履道行清而修

姓名久已登瀛洲宗師令作漢中游掌判羽藉三年留
平心待人不忮求冲德應務知剛柔一家無間誰操矛
九折弗歷何摧輟鶴長鳧短非我謀孰居無事生贅疣
以此繕性諸緣瘳愛君不置况為仇一朝告别催行騶
黃鵠高舉攀莫留浩歌把酒紆離憂他日有懷元丹丘

贈龍巖上人草書

韓云浮屠多技能祇今復見龍巖僧高閑懷素去已久
肯向死灰求續燈手追心慕忽有得筆底渙然無滯凝

雲烟結暝鬼神泣雷電索怪蛟龍騰懸崖百尋瀉瀑布
老樹千歲垂寒藤鐵為門限自茲始但恐紙價相仍增
我聞雪菴亦工此好事往往輸縑繒都城顏扁妙天下
驟得榮寵非階升龍巖更須追三昧無俾斯人專美稱
賀董宜御得子又得乃尊拜漢州太守之信

丹山鳳凰五色雛渥洼龍馬千里駒春風年少董公子
入掌英物初何殊閭里相傳真盛事玉菓犀錢供利市
蘭湯浴罷錦棚濡願頰豐盈胎髮膩自慙湯餅先得嘗

續補新詩書弄璋君家好事重併至此兒賦命尤宜良
查查乾鵲噪庭止一幅親書來萬里開緘預報得官歸
到家便有添孫喜玉牙珠顆嬌嚶咿乃翁開顏笑熙熙
飛騰它日姑置之萬金難博此一時

壽德衡弟

春風來處元無跡但見梅梢冰的皪臘醅沽得亦自醲
滿注梨花浮重碧眼明見此兩清竒便欲一醉哦新詩
側聞鴿原傳好語借此為君稱壽祺

題赫舍哩總管夫人貞節卷

柏舟清風能啟予世雖相後如合符平生不失歲寒節
健婦果勝大丈夫繁華一洗脂粉氣蕭閒自有琴書事
國家恩澤不負人已見門楣刊大字

送瓜爾佳多羅台同知

守能清白行無礙肥馬輕裘亦何害內實空疎外示優
褒衣博帶良足羞人知翩翩貴公子誰料胷中蘊經史
倅州出手聊小試律已知人俱可紀

國初忠靖為功臣其子作牧龔黃倫孫今卓然乃如此
世澤既久彌光新願君植志不少屈洗眼青天看橫翼
我窮無錐有此筆能為諸公聲偉績

送吳閑閑真人

天風吹衣雨浥塵盧溝曉別詩境新石梁雄據天下津
羣峯迤邐西北垠草未點綴生精神驕馬駐足車停輪
紛紛追逐皆朝紳相與祖餞為何人閑閑嗣師方外臣
貌雖老氏心儒珍恩許還家壽乃親翁媪年皆八十春

饒國啟封降絲綸上尊分賜光祿醇道旁見者咨嗟頻
此行豈為思鱸尊觚稜遠瞻戀巖宸青雲我亦忝致身
先世贈典蒙深仁但恨不及生存辰因君此圖淚霑巾

送巨德新郎中之蜀省

白頭相見又分襟遙指坤維出禁林依水泛蓮三省暮
飲冰餐藥一生心行裝雖謝糶糊錦束帶猶橫錯落金
撫蜀贊襄謀素定過家榮耀渥殊深鄉民戴白歡爭迓
先隴焚黃愴曷禁報國不將知己累如君合向古人尋

前驅負弩初何效，遠慮籌邊夙所欽。賢似嚴揚懷曩昔，
學同齊魯勸方今。里中試採王褒頌，溪上聊追子美吟。
倘有北來馳駟使，丁寧佳信莫浮沉。

再送巨郎中

官歷三省幕家無一囊錢，玉堂方少憇趣裝。又西川憶
昔從遊童稚年，別時青鬢今華顛。相逢京輦傾肺腑，恍
若隔世俱茫然。愛君真淳復通敏，韓國援引同周旋。帝
心簡在自潛邸，呼以姓名稱其賢。此行贊畫制全蜀，跡

未及到聲先傳劍關無險錦城樂憂歡分却西南天職
思第一固邦本要使民庶沈疴蠲綏懷蠻徼得安靜百
廢具舉網維聯興學與薦士當務尤所先不羨十萬矜
腰纏不願一日官九遷但期報國兼不負知己石有可
泐心彌堅

題準提菩薩詩卷

東坡當年笑羅什臨死徒然求呪術豈如姑也得神授
一念只已衆生疾莫非補陀弘誓深借口勝出方千金

我雖未解浮屠法且喜能施濟物心

盧溝橋符氏雅集亭

盧溝石梁天下雄正當京師來往衝紛紛行旅半英彥
掉鞅振策無停蹤符家介側敞亭構坐對竒趣供醇醲
雖云好客成雅集問孰車騎真從容

題承慶堂詩卷

孫宣
慰家

祖宗神武定九圍先正以勤耀皇威于時善救犀兕衣
惟恐傷人與仁依一念若此福所歸紀功三葉照常旂

爵皆錫公世云稀他姓子孫或已微君家煢煢猶光輝
顏堂承慶要發揮開卷爛然盈珠璣如松栢茂充前徽
藉用白茅其庶幾

贈傳神李肖巖

人生天地洪爐中形色散殊俱不同畫師筆底要真似
妙想乃與天機通肖巖後出獨超詣睥睨衆史如兒童
京師摹寫富箱篋竒麗福艾多王公神情所賦各臻極
千變萬化無終窮遂為當代顧陸手足配向來褒鄂雄

明牕副本得寓目起敬毛髮森寒風祇今聲價愈增重
姓字已徹明光宮塵容俗狀亦何者年齒未及先成翁
既無開朗謫仙韻又無圖畫凌煙功君胡惠然肯相過
坐對熟視心神融煤鬢紙上畧點畫稍類雲月猶朦朧
須臾壁間出幻影恍若面映新磨銅人能肖吾不自肖
內發感愧顏生紅聖賢體貌等人爾所貴踐履惟能充
作詩答謝肖巖貺但恨意遠辭難工

題苗氏孝義旌表

昆季易世親疎分祖宗視之均子孫譬猶樹木散枝葉
氣脉由來同本根集寧苗止心悟此和睦族黨懷深恩
父與仲季生異居季沒生理難為存代償逋負猶未已
綴離合異仍相屯迎歸仲父撫諸弟一家生意春溫溫
賢王嗟賞為旌表煌煌大書孝義門作詩稱頌遍寰宇
從今庶化薄夫敦

題雲中郝克謙君讓孝義卷

雲中習俗尚豪武執德君無愧鄒魯事親曲盡愛敬心

送死何堪茹荼苦三年衰經廬墓餘化被鄉閭非小補
復辭旌表恥微名誰道今人不如古

題孝則衛奉常詩卷

日衛尊公留漠北千里孝思初不隔一朝白首果來歸
俱慶送終情兩獲庭闈天許壽康寧子佐南省官詳刑
問安博得平安笑回顧頽然四寧馨

長庚書院

謫仙讀書桃花巖人去已遠餘松杉李侯宦遊憇此地

絕愛境勝超塵凡買田意欲成卜築墾闢蒼莽觀空嵌
偶隨計偕到京國塵土滿馬緇素衫白雲老人雅相厚
導以良策出至誠謂宜仙隱置書院名字不朽蒼崖剝
侯聞其言即許諾義氣勇往先風帆割田四百充廩餼
內視炯炯神明監要令菁莪助樂育豈憚草棘勞薶艾
太羹玄酒知正味一洗舊嗜偏酸鹹行看弦誦殷山谷
有似春意開機緘千秋有客訪遺跡刮剔苔蘚尋書銜
九日翰林薛學士出舊寄李述之長句次韻

翰林寓舍無往還所幸侍公函丈間日聞清論已足慰
意外得失何相干茲辰雄篇肯見示要使詩社盟無寒
憶昔在家逢九日聊應故事登高山菊萸且復繼桓景
絲竹豈能希謝安只今節物若無有但和佳句消餘閑
去家非同迫宛葉山川相繆工障隔曉來搔首望西南
長風吹我蕭蕭髮一杯莫為老親壽良愧尚作京師客
羈愁眼底可奈何忍看明日黃花蝶

題錢舜舉畫煙江疊嶂圖

江山奇絕吳楚鄉畫史又與生錢郎錢郎下筆得天趣
意象髣髴開衡湘浮空水光接巨波隔岸嵐翠摩穹蒼
幽巖梵宮半隱見老樹樵舍相迷藏中流一葉泛小艇
遠澗千尺橫脩梁山居熙熙自太古下視擾擾徒奔忙
我來京國行九軌塵土眯目鬚眉黃困餘偶作林壑夢
歸計未遂驚彷徨明牕豁然看此畫便覺宵次生清涼
何時拏舟徑成往長嘯振衣千仞岡

題中書掾王景先祖母八十詩卷

景先母與其
祖母兩世早

寡

孀居兩世茹荼毒惟善處之能受福王家祖母八十餘
眼見孤孫今食祿蘭省歸來日未斜綵衣三釜清歡足
人生榮親固已稀何況詩書繼芳躅

題吳城廟

維人依神神依人吳城之廟宜明禋禳禱祈禱不汝嗔
水旱疾疫方輦呻應若桴鼓臂屈伸尸其祝者惟張君
脩完祠宇囊資貧金碧煥爛還一新為君徵福非為身

黃冠濟世知無因庶幾以此為求仁

中秋日寄四川王克紹憲僉

秋風索索吹庭梧有美一人西南隅我欲致之路云遠
延頸搔首空長吁若人溫粹天球質少日挾策游京都
家庭詩禮固有自師友磨琢誠不誣紫芝眉宇消鄙吝
黃憲度量難澄汗聲名籍甚滿壁水羽翼還起飛雲衢
螿叢持憲乏指使烏府遷秩勞馳驅鷹鷂擊強雖所職
麟鳳化惡尤良圖劍關連雲固天險目可隔斷心能踰

今朝有客索詩寄老筆信手慚糊塗况當中秋月色好
兩地光彩初何殊舉杯屬君不可得夢寐倘能相見無

和薛秉彝冬菊二首

貞心自與竹梅友正色不知桃李妍孤芳後殿復誰右
衆卉前驅從汝先天道循環純不已生意几行霜雪裏
欲將此理指示人思我親友看停雲

花中惟菊存晚節不比凡蘂分媿妍可憐一種更傑出
霜雪質質誰敢先先生愛花心未已妙選都入詩囊裏

分付此事今得人薛家有收詞如雲

三用韻和前冬菊

黃衣綠裳秉貞德天地閉塞無妖妍正如陶翁當晉李
五斗葉擲知幾先諸君佐命我獨已酌酒嗅英三徑裏
大書徵士乃斯人可惜美新揚子雲

題李右丞明之孝感卷

君不見王祥昔日孝純至魚雀供養皆可致又不見董
生召南孝且慈狗乳雞來哺其兒李公視昔孝尤大瑞

鶴翔簷亦可怪父誤當誅請代之聖恩憐憫俱全貸無
何母亦晦雙瞳以舌舐之昭發矇方其勇救豈復計一
念誠實能感通天與其壽登九秩帝與其爵右丞弼惟
天惟帝庸可報但守此志同金石祥曾有傳董有行至
今煒燧存勞跡翰林諸公詩已多留待他年垂史筆

聞木犀香示德衡弟

木犀清芬何所似有如浩氣塞天地羣芳馥郁雖可憐
差等猶為一國士四時已愛碧團團着藥黃金萬粟攢

天與世間香十日西風收拾上高寒

老人星壽德衡弟

煌煌南極老人星精氣下降為仙靈儼然被服清癯形
盤石兀坐松蓋青金童玉女供使令神龜曳尾鶴梳翎
鹿亦闖首如諦聽隨緣分貺裕齋庭裕齋起敬巖中扃
旃檀一炷薰德馨錫以上壽仍康寧不用保嗇食芝苓
默存內景黃庭經翁兄放言如建瓴拊掌大笑三千齡

題米孝廉詩卷

米君孝廉節獨完教授鄉里不求官養似曾參必有肉
清如閔叔寧無肝玉潔制行風俗化柴毀執喪天性安
高門何必事旌表錫類要使人人觀

新麴米酒歌

梅隱先生命
作就為壽

騎陽行空勢方烈刈麥農夫寧憚熱天旋雷動飛玉塵
霧渤雲蒸成麴蘖麥秋方罷還插秧穉稭西風千頃黃
腰鑷肩擔行相逐共趁晴色催登場碓舂糠粃光如雪
汲泉浙米令清潔炊糜糝麴同糅和元氣網縕未分裂

甕中小沸微有聲魚沫吐盡秋江清脫巾且漉仍且飲
陶然自覺春風生君不見淵明有田惟種秫醉裏作詩
聊自述又不見幽風十月獲稻忙春酒介壽俱徜徉但
願年年遇豐稔更須三萬六千場

雜言

題鄧州宣差射虎圖

時貢
虎睛

猛虎在深山藜藿為不採編鬚履尾非人能託喻而言
至危殆况欲決眼取其睛無乃未得先菹醢伴來責貢

將何如南陽太守膽滿軀山間勇往蒐索見馬上注矢
彎雕弧一聲霹靂射命中怒踊即仆挾乙無雙珠入手
電光滅獻于公所供藥需願侯無徂此一舉褒鄂龔黃
當自許用之敵愾與除苛立收奇勲報明主

觀王維畫

摩詰本詩人精思詣元化緒餘臻畫妙遂方吳子駕寫
成高士奕棊圖意態蕭然各閒暇儒冠羽服對紋楸老
僧傍睨誠可詫形如槁木心死灰豈識枰子有機獲抑

亦至人聊自適肯效澆風生變詐歷庚默計五百年一
着指間猶未下樵丁不獨爛斧柯閱世紛爭幾王霸乃
知非人看畫畫看人今古滔滔等晨夜陳迹真成俯仰
間如掣電光明隙罅宣和殿中曾寶玩品題愈重千金
價當時內府收欲觀誰敢借流落長存天地間在在護
持宜有神物為憑藉

送李文鼎教授兼簡侯伯正

關中耆宿儒比歲多不幸惟餘侯奉常今始識文鼎青

山匹馬度崔嵬白髮蕭蕭已垂領問其所事笑不言但
云此行特造請政猶欲水沃渴焦不赴源泉目眇井款
曲詢知盤谷孫文獻風流尚修整春宵不寐聞鶉聲曉
起理裝趣歸程到家會我奉常兄莫將涇渭分濁清要
期健飯保脩齡九十傳經如伏生

重陽被酒戲書多金謠

麤衣糲食留汝到華顛厚味美姝催汝歸黃泉人言多
金可治生我道多金只買死君不見兒孫笑擁老田翁

全
卷二
姬妾悲啼貴公子

卷二

閑居叢稿卷二

欽定四庫全書

閑居叢稿卷三

元 蒲道源 撰

五言律詩

壽趙經歷

崧洛居中土人才自間生星躔動芒角金氣與高明
芹泮規模好蓮帷議論清黑頭長健在洗眼望雲程

贈韓知事

近喜紅蓮幕人才又一新青春能奮達素節豈緇磷自

恨摳趨緩多慙邂逅頻詩成供莞爾聊欲話情真

餞洋州長官

監郡初交篆洋人遽索詩以茲無厭數知昔有施為喬
木百年在甘棠再世思青雲前步濶穩駕未為遲

將至中山

中山何處是隱隱望孤城遠靄青林暗斜陽白塔明韓
蘇名不朽遼宋恨應平策馬長途晚風沙老客情

題褚鑑先明遠亭

危亭擇竒勝登賞寄遐觀
隱几月華入出門天宇寬
面墻嗟壅塞坐井笑欺謾
表裏須同致休成兩樣看

餞楮鑑先

臨行方識面未暇細論心
但見求詩切從知好德深
宦游應已久鄉思自難禁
莫把牛腰卷歸裝當索金

偶書

入樹秋風早驚心節序遷
晚雲蕪去鶴涼雨靜鳴蟬
得句因新意耽書是宿緣
平生愛冲澹何事亦華顛

閏七月十五夜月

玉宇明如洗銀盤爛不收今年非閏月此夜即中秋名
實難相副陰晴豈豫謀及茲清景好且為一搏酬

中秋雨次前韻

掛鏡光何在懸麻雨未收不成千里共虛度一年秋剪
紙無仙術藏樽有婦謀却將前日句飲罷自賡酬

乾州學正牟中行訪叔于蜀

勤子闖幽石欣然識面初蜀天留季父秦地敢寧居正

想成歡際應忘歷險餘明年歸有約還為赴新除

月蝕詩次晏耕叟教授韻

滿盈不可恃消鑠暫成昏人心一時懼天眼萬古存妖
墓尚逋劍餓虎方守闔言高無乃罪括囊取諸坤

不寐

不寐情尤耿聞更夜向深撫牀驚鼠啣歌枕厭蛩吟擾
擾無窮事悠悠未了心華胥真樂國合眼試追尋

挽鳳翔馬氏賢母

馬嘗出粟
濟大德荒

明德服大練文淵生女賢至今雖已遠末裔尚依然子
訓嚴逾愛閨儀後若先歲荒蒙惠者洒淚遍新阡

洋州儒學正劉敏道得代歸

設科時未暇學校餽羊存亦以循資例聊為入仕門羨
君由此進求贈尚奚言勿以筌蹄看頻將舊業溫

題人慶八十詩卷

身是七朝民年登八袞春伴行鳩杖瘦介壽蟻醅新祿
養孫能逮家居志得伸遥持玉堂詠歸託晉州人

題國子生張行修歸養卷

不待陽城告歸心
勇決餘祇緣親向老
豈為士懷居此
是真知學應勝謾讀書
勗哉儒事業天報定無虛

送拜特穆爾之天台治中

西域雄豪遠南州
惠愛多繭絲非雅志
襦袴聽新歌仙
境閑追訪民情自
決和會因龐驥
展回轡接朝珂

和秋谷平章上都寄示韻

公論何嘗泯浮言
枉自侵明公之出處
善類以升沈導

日功非淺回天力尚任於昭有神鑑偏燭老臣心
獨樂今司馬忠誠世所推帝心元簡在史事實優為此
自陰存數餘非我敢知願公攄素志黽勉荅明時

晉寧房秀才下第

近閱賓興士多君氣質淳鷄飛雖暫退蠖屈定求伸勿
羨囊中穎還輕席上珍三年姑少待鳴即看驚人

題漢州多勝亭

金雁亭邊景難將一字褒江山雖衆美人境亦相高解

紱栽薜菊開樽擷澗毛
令人生遠思聲利等秋毫

題王仲寬餘慶堂卷

諼草開偏耐蘭芽植已稠
安榮欣此日積累繼前修
惠迪宜逢吉勤耕乃有秋
堂名非溢美微意要深求

送榮澤張縣令

人說張明府胷襟自八牕
脫身曹史局試手子男邦
樂易民情悅公庶物議降
會聞榮澤政前後號無雙

題陝省都事薛君英好古軒卷

聖賢去已遠義理存諸言篤信有斯人簡冊開明軒食
寐或忘廢朝夕恒討論好而至於樂踐履尤可尊

題莊氏見山樓

白眼憎俗物紅塵遠市廛高居得如此雅興自悠然翠
挹憑欄外吟成拄笏邊相看兩無數誰似主賓賢

題劉孝子卷

生喪明業陰
陽失母有父

人說劉君孝供需只五行可憐書月蝕何害性天明血
淚既哀死甘腴惟養生清時公論在門表足光榮

送劉宰之官溫縣

昔日庶能簿曾聞去後思懸知溫縣政不負冷官師製
錦心優解鳴琴化易施民安即循吏何用更求奇

送胥秀才赴雲南教授

詔下開文治君歸得教官讀書酬雅志旋旆詫榮觀勿
以居夷陋當思稱職難方知誤身者初不在儒冠

送人赴教官

逸姓
氏

學職無卑小能弘亦在人升高須自下溫故可知新勿

慕囊中穎還輕席上珍他時看成就一振舊衣塵

送劉彥讓山北憲史

俗吏固不可腐儒良足嗤明經先植本讀律貴知時還
自士林秀陞從憲府宜更將清慎字座右作箴規

送人之憲史

逸姓
氏

讀書期有用出仕愧無名擢自儒林秀陞陪憲府英持
身先玉潔用法貴衡平萬里雲霄路權輿在此行

山西宣慰司扎巴經歷辭御史不就

顏色未頗識聲華今藹聞栢臺辭要職蓮幕替奇勲
惠及山西道才空冀北羣更兼忠義節仰答聖明君

題江南醫者王道人卷

荆國來芳裔草廬為序文清修真不忝許可固宜云玉
筋臻神妙金丹脫垢氛地行仙亦樂何必躡青雲

題節婦賈氏傳

剗股已親病髮髦垂我儀九原如可作百歲以為期
皦日言猶在秋霜節不虧子成門有表天道豈無知

九月十八日黃菊始開時且禁釀謾成示德衡弟

苒苒秋事杪幽叢花始黃直須凋衆卉纔許見孤芳重
露洗金質嚴風吹綠裳陶翁如有酒何日不重陽

走筆與德衡弟

茗椀忘言處相看俱白頭情知天下樂各向意中求鳥
語彼能解花開春自謀寓形霄壤內俯仰亦何憂

陽月十日旦起示薛生

深得閑中趣何求身外名
晨香生淨想午茗滌餘醒
習氣書難捨風光句偶成
天公於我厚自用豈宜輕


食苦蕎糕

穀中偏早熟濟歎未渠厭
農舍勤相饋盤飧得共霑
羊肝堪比色蜂蜜已輸甜
苦盡甘來語於茲亦可占

偶記少時小年能綴文詩

彼美誰歟子嶄然早見稱
綴文當世有惟汝小年能
稚齒為星鳳清姿秀玉冰
聯章成脉絡緝句合規繩
穎悟

過長吉推揚自少陵可憐東魯客頭白短檠燈



閑居叢稿卷三

欽定四庫全書

集部
閒居叢稿卷四
五

詳校官編修 臣 錢 樾

侍讀 臣 孫球 覆勘

覆校官中書 臣 汪學金

校對官中書 臣 潘奕雋

騰錄監生 臣 莊承箬

騰錄監生 臣 徐 莊

欽定四庫全書

閑居叢稿卷四

元 蒲道源 撰

七言律詩

上蔡司廡使二首

栢臺聲望久聞廡，驄馬西來得具瞻。
正芴垂紳存大體，奮髯抵几走羣纖。
官無饕濫威風凜，物有生成化雨霑。
勲業共推家世舊，鳳池平地不須占。

自任當今捨我誰，敢將直道進匡時。
事來肯避風波惡。

判重寧聞海嶽移相漢韋賢真有子興周姬旦豈無兒
赤心報國遵家訓忠孝方能兩不虧

憲副王公重到興元

驄馬西巡又隔年袖詩兩度得趨前翰林風月文章手
憲府冰霜政事權出語無疵皆白壁消閑何物止青編
聲名霹靂驚天上已聽喧騰萬古傳

送梁君章

梁因兵失姑後得于興元
景氏團聚後復回臨洮

最憐姑姪鬢俱華兵後相望道路賒幾載睽離應有數

一朝團聚喜無涯
歸心又逐秋風起
別後那堪晚日斜
樽酒平安須滿飲
馬頭西向是君家

代送梁君章

去歲君章
子先見姑

賢郎去歲省姑還
今日親行冒險難
覲面共嗟成白髮
認聲無復識朱顏
瀟瀟牕外鳴疎雨
歷歷燈前話故山
終擬移家居漢上
暫歸不用唱陽關

史繼甫錄事司典史

千載明時獲遇遭
丰姿挺秀氣尤豪
華峯秋隼精神緊

溟海風鵬羽翮高政美自寬烟火禁才長聊屈簿書勞
期君騰達興門閥不愧春秋一字褒

趙和之壽

慶源初發自瓊流派深長未可涯教子義方無愧怍
待人和氣亦謙卑良辰又際懸弧旦佳境渾如食蔗時
五福壽惟仁者得垂蓮千歲飲芳卮

丁錄事之仕

白髮叅軍赴任新歡聲喜氣滿城闔老成練事明三尺

煙爨安居樂四民
宴室香凝松入夢
公庭訟簡棘生春
寒儒共作斯文賀
釋奠今秋已得人

座上壽鄧明仲

汗血權竒志已邁
駸駸殆欲度驂駟
可人玉樹丰姿秀
與我金蘭氣味投
一脉斯文知有永
寸心天爵在能修
祝君具慶年年好
直着班衣到白頭

閑居讀四將傳有感

宋鼎中遷僅未亡
奮然四傑擅鷹揚
江東已幸開新主

河朔終期復舊疆時相姦邪工沮撓中興事業竟淒涼
至今凜凜有生氣三復遺編為感傷

亢府判宅落成

美哉輪奐照康莊盛事爭誇畫錦堂魏證枉教移帝殿
姚崇何苦住僧房青雲路穩鶯遷好畫戟門深燕寢香
不特新居為可賀克家猶喜見諸郎

覺和尚菴賞白蓮

冰雪肌膚出淤泥伶俜寒影照漣漪曉風浮冷夢初醒

夜月嬋娟清更宜
未要露濃垂別淚
先看水滑洗凝脂
陶詩近體驚兒女
大笑廬山遠法師

壽鄧載之

深喜安居託里仁
獲從賓客賀佳辰
眼前秀發班衣子
堂上康寧白髮親
和氣自應浮壽斝
行年更為數靈椿
直須釀取如澠酒
剩醉梅花十月春

郭某席間賦

喔喔晨雞喚夢醒
牕啣好月壁啣燈
宦情嚼蠟淡無味

世路登天吁可憎十載飄零都是客一廛寂寞靜于僧
調羹事業無勞說深謝諸公愧不能

察司陳知事

次翁斫雲陳先生之子

生遲不見斫雲翁嵇紹昂昂有父風設榻憲臺為上客
揚旗詩壘作元戎讀書素負匡時志正已應多及物功
今日朝廷用賢急早聞催赴大明宮

和史儒首重九韻二首

籬菊花開却為誰最憐不負九秋時興來惟用詩篇遣

吟就喜將塵硯吹，但有金英浮蟻醪。
從無玉笋捧蛾眉，猶勝杜老傷流落。
謾憶茱萸賜一枝。

龍山故事始於誰，歲歲登高定此時。
菊朵滿將頭上插，秋風從向鬢邊吹。
酒狂不管歌烏帽，詩好還須讓白眉。
寂寞東籬兩寒蝶，翩翩猶戀可憐枝。

餞蜀憲僉王元亨

一柱西南儘力扶，已教餘子愧非夫。
歸來衰絰終憂制，豈料絲綸到倚廬。
疇昔憲綱曾整頓，此行蜀道不崎嶇。

春風聽馬經過處父老遙知識故吾

餞曹侯之憲使任

稅駕侯藩尚未遑已聞西憲促提綱眼前逕路從來濶
度外功名不用忙麟鳳固知非搏擊豺狐未信敢跳踉
旁人莫訝春風過凜凜威稜看肅將

與學士劉希載二首

時為採訪
司至興元

照人丰度絕纖埃黼黻皇猷得異才簡拔正為今日用
巡行快覩使星來勝裁桃李清英滿力剗荆榛公道開

願借飛仙一丸藥不憂弱水隔蓬萊

向歆經術自淵源召入承明藉討論已為文盟執牛耳
肯容晚學造龍門異時但慕聲名重此日能陪笑語溫
尊主庇民知有策更將諮訪荅明恩

和耶律奉使寄山木公詩韻

兩公姓字徹穹蒼隨處棠陰蔽蒂涼許國肺肝同皦日
憂時鬢髮各微霜德星共喜來京國太史應占聚古梁
更有翰林同唱和鼎分文陣各堂堂

上耶律左丞二首

掃退陰霾日正中
天心方責太平功
臨軒遣使非常例
為國披肝乃至忠
萬里遼東驚鶴至
一朝冀北見羣空
豈容閑袖調元手
黃閣還歸眷倚隆

昨宵李邵候星躔
此日輶車入漢川
烏府舊曾稱鐵面
鳳池到底是青氈
霜髯憂國遽如此
月眼看書尚瞭然
六轡諮詢有餘暇
錦囊定賦紀行篇

送馬教授美解東歸

學與時行不悖差况兼才器出名家太羹玄酒有真味
璞玉渾金無點瑕一再詰問官秩滿四千里外客程賒
晚成看取文淵器莫對秋風重嘆嗟

賀依爾佳副使弄璋二首

忠靖公家世澤存况君積善更培根相承自合繇瓜瓞
必復行看在于孫豈為中情憐絳秀已將英物許桓温
北堂盼徹今初見肯避含飴哺育恩

一念初萌病涉憂天教熊夢稱心求海中仙果原遲結

掌上明珠豈暗投丹穴有雛還得鳳青渠留語果騎牛

君以嗣故出錢為橋王青渠臨終以騎牛祝故及之

君家湯餅初開局袞袞從今

莫厭稠

總判覩佛光于雞頭山次韻

雞頭孤聳翠連空雌伏羣山獨讓雄須信地靈光有異
定應人到意先通幽微更出三網外真妄端生一念中
懶我無由看竒特曉牕擁被月華東

送趙君錫之秦州吏目

十年為吏困無貲平昔操存便可知精悍不妨身短小
笑談足了郡支持宗資主諾應多暇儀狄裁書且暫辭
贈別一言君記取莫教人作腐儒嗤

壽任壽之

清遠堂中酒泛卮森森蘭玉照階除論年孰與諸任齒
尚德優為一縣師芹藻漪漪春澤滿桑榆戀戀夕陽遲
相望兩舍難趨賀謾遣書奴為致辭

贈月軒日者

宵中珠緯自分明月滿秋軒夜氣清靜處要將身體驗
說時奚尚口縱橫立交演畫皆臻妙候色占年亦造精
知我生辰宿南斗一詩何惜送行程

送王茂先赴憲府選擢

臨事剛明接物和眼中如子豈能多清流已許優充選
公論方知久不磨疇昔稔聞仙注籍此行何異士登科
離腸飲罷宜催發不用驪駒更緩歌

挽任壽之

前輩凋零嘆曉星可憐配月獨長庚梓州家世餘文獻
華屋丘山隔死生年及耄期夫復憾葬從古禮足為榮
緬懷清遠堂中像東望潸然欠一行

餞楊同知任滿西歸

道傍笳鼓記迎新又作長亭惜別人千里畏途成雅俗
一言寒谷變陽春朝廷有意歸揚震父老無從借寇恂
金印此行如斗大西還遙望使君塵

寄張允濟憲史

脫身府史簿書叢榮選西臺得鉅公立已立人施有漸
讀書讀律用無窮高風舉翮孤騫遠何日掀髯一笑同
莫惜橫霜案頭筆常題數字寄征鴻

挽趙伯範庶副

一門卿相自蟬聯攬轡君方志慨然忍見黃泉埋白壁
不教清廟奏朱絃霜寒鴻雁行新斷日暮驂騑路莫前
絮酒隻雞何處奠西風哀挽寄靈筵

餞太子賓客王山木赴召三首

龍飛天表廓羣陰小必求賢正自今已分引年無仕志
何勞新貴有知音詢諮國論須黃髮報答君恩亦素心
休沐歸來宴私第免教手足歎商參

星馳使傳趣曹裝北望觚稜上帝鄉豈為一身辭溽暑
要令萬國變清凉燮和正藉鹽梅味事業終歸汗簡香
踈傳功成還有疏桑榆留取日餘光

大經大法幾能知愚陋從公稍質疑餘事從旁觀灑翰
有時乘間獲聞詩寵恩固與人同喜別恨情知我獨私

此去藥欄誰枉顧碧雲凝睇暮秋時

和竹軒道錄見贈

綆短何由望汲深清詩為我滌塵襟雖披風袂投仙籍
時吐天葩照士林偶爾笑談成撫掌淡然玄默久忘心
南褒自謂棲遲客誰識希聲是木音

冬菊開於盛寒簡仲章益友

陳跡東籬一片荒歲寒驚喜見鮮黃叢依徑竹分將翠
藥闌江梅讓與香只道卓為霜下傑豈知更有雪中芳

陶公已遠名尤著可是茲花節愈剛

次竹軒道錄桃接梅韻二首

曾是玄都舊日栽半生夢斷却為梅蒸霞方艷依稀帶
傲雪清姿取次開佳實要期和鼎鼎瘦株安忍伐條枚
老仙月下頻吟繞豈為升章步斗魁

奪胎換骨雪中開尚有妖紅淺暈腮芳樹合供和靖繞
仙根原自武陵來風過幽戶傳香信月挂橫枝作鏡臺
褒拂好花須好語主人况是足清才

寄挽李宅馬氏賢母

半生自號未亡人，素節高風孰與鄰。
教子不將恩掩義，推財能以富周貧。
風霜共嘆庭萱悴，雨露空餘宰木春。
挺挺諸郎如玉立，向來懿範更光新。

節婦劉氏挽章二首

栢舟高表照城闔，素節孤風久更新。
雅羨松筠堅晚歲，陋嗤桃李再陽春。
敬姜慟哭深知禮，謝蘊清言自絕塵。
今日九原同穴處，我知應不愧良人。

夫天不幸早為憂白壁持身反見尤簪服從權期取信
琴書適意復何求可憐桂逐秋風殞又嘆萱隨夜雨休
留在蘭孫一芽好莫將天道付悠悠

次韻答竹軒道錄見寄二首

其一褒莊即事

稻梁饒足水邊莊竹樹因依野外堂詩老歸來尤鄭重
鄰翁歡慰絕厖涼犬能識主還相逐鳥解知名祇自揚
久矣城居厭塵土解纓欲擬濯滄浪

其二冬日即事

消息應從日下來姓名知己徹丹臺門前朝士爭投刺
爐畔麻衣但畫灰白髮莫言疎世味黃冠元自隱珍才
閑中袖手搜佳句野馬誰知本是埃

九月八日賦二種芙蓉二首

其一紅芙蓉

豐肌弱骨與秋宜宿酒酣來不自持豈為嚴霜成槁質
要憑初日發妍姿燕姬入畫猶嫌陋蜀錦團窠未足奇

獨對芳叢寄幽興子高真是遇仙時

其二轉觀芙蓉

露涼風冷見溫柔誰挽春還九月秋
午醉未醒全帶艷晨粧初罷尚含羞
未甘白紵居寒素也着緋衣入品流
若信牡丹南面貴此花應是合封侯

贈杜庶訪

多冠諤諤盡英賢時論尤推尺五天
身正豈容姦在側法行能自內為先
迅雷掩耳嗟何及明月當頭照不偏

正際元貞求治日可能持祿但圖全

錄事司解宇新成

不費公帑不斂民眼中輪奐一時新編氓亦喜司存定
胥吏何憂轉徙頻戒石有銘槐共古公庭無訟草留春
從今宴坐觀心處餘庇須教溥及人

賀楊世英治中新除

兩省聲華著望郎歸來未許便韜藏青天寶墨下新寵
白日錦衣行故鄉曾捋虎鬚非苟合得伸驥足更奚量

四書儘有工夫在仕學從茲道愈光

送李道錄

德業清高體性純玄門三載博施仁祖庭稔聽聲名舊
漢郡欣瞻氣宇新識量不同凡俗客襟懷還是謫仙人
明朝跨鶴乘風去日月壺中且自珍

壽李推官

愛重寒儒禮蔑加情知孔李是通家精金百鍊元存性
美玉重磨本不瑕眼底雲仍天有報樽中風味日無涯

期君壽考如松茂老幹蒼髯閱歲華

餞王某入省掾

晉產英竒見若人紫髯郁郁照青春
脂韋豈羨常情悅骨鯁須教正論伸
不負相君平日顧坐令田賦此時均
回轅早慰梁民望一簣誰能繼後塵

餞齊節使入蜀

去歲如京乞水衡歸來遷秩便專城
自甘進取輸英妙天遣功名屬老成
坐看蠶叢皆樂土肯教烏喙毒窮氓

漢中遺愛人猶說更要西風送好聲

餞王同知美解東歸

眼中看熟幾楸枰出貳侯邦信老成悃幅無華忘吏巧
設施有道合人情歸心梓里胡為切彈指瓜期已及更
筋力未衰時任舊且須黽勉助升平

和李之晦

書齋兀兀度朝曛載酒相過賴有君自為凡禽難比鳳
更慙猶草敢同薰七年旱渴逢甘雨萬里風清破宿雲

芝宇瞻依慰平昔情知所見勝於聞

贈康案牘之任

年來案牘閱人多一見知君氣宇和久向蘭臺推俊爽
且教蓮幕暫經過簿書事了無煩冗官長心閑得嘯歌
休嘆功名尚卑薄為山覆篲即嵯峨

臘月八日王縣尹壽

時監修
文廟

遺愛曾歌令尹賢未容投劾徑歸田泮宮宣力猶如已
吾道諸公肯結緣晚景桑榆春尚好歲寒松柏老彌堅

吉人為善天昌後兩地雲仍慶壽筵

贈張廉訪回漢中時張見過

騶從傳呼陋巷中忽驚御史駐青驄
便教部屋光相照始信韋編道不窮
感激肝腸明皦日笑談牙頰漱清風
今朝攬轡人應去漫刺何緣再一通

色目廉訪與張廉訪見過

繡衣將指到梁庭丰采峩峩見典刑
白簡久嚴晨案事青燈不廢夜傳經
忽聞聯轡來卿月深愧衡門聚德星

吾道自今增九鼎詩奴聊為表中局

次張庶訪見寄

事君無意復還鄉此日明堂棟梁鸞鳳豈能稱鷲鳥
蟾蜍安敢望飛黃人欣霽月三秋滿目送歸雲萬里長
更有新詩壓元白章程未可議張蒼

題開成路晚景亭

西邸葭莩意自闌不求榮利衆稱難靈椿丹桂皆天理
古栢蒼松閱歲寒蔗本有甘因倒啖芸編無蠹為長看

未能杖屨相從樂遙為先生賦考槃

與蒙古教授馬良卿

澶淵名族伏波孫時務通明氣質溫兄弟白眉推秀傑
公卿青眼合量論冷官隨分三年滿大器成名異日存
未得相從見顏色寄詩徵取友人言

雨中走筆書

四集雲容鐵騎來俄然空際壓煤炁滂沱幾陣江湖合
霹靂一聲天地開生意豈惟回草木煩襟亦為洗塵埃

化工神妙雖難測也要調元得上才

宋錄判仁卿祈雨有感

潔齋徒步陟雲岑

一作穿雲徒
步陟崎嶇

閔雨知君用意深旱挹

靈泉清似玉澤均農畝勝於金他年定卜為霖手此日
端能簡帝心未秀秧齊成樂歲民將歌舞替呻吟

次王仲禮韻

仲禮生朝大雪
次日詩來荅之

惠我新詩見至情風簷披讀眼增明祇知大雪袁安卧
誰料長庚李白生先施固慙今日報後凋元有歲寒盟

知君賸有如川酒定為來遲舉罰觥

贈王秀才歸葬二親

秋風兩鬢已華顛
兵後鄉書涕泣然
桑梓歸期寒復暑
松楸寸念日如年
滯留莫訝來何暮
拜掃誰知夢獨先
親舊此行成會語
巴渝江上月應圓

耶律總管自西蜀還漢中

儒館丹青氣象雄
諸生成詠浴沂風
永懷昔日成功最
如見賢侯在眼中
未問甘棠思召伯
且先泮水頌僖公

舊轅蜀道重趨謁滿慰塵心喜曷窮

賀何提領開惠民局

岐黃至藝久精研霄漢飛騰正妙年深羨一朝膺寵渥
豈知三世得真傳民沾實惠仁應博親及光榮孝克全
從此大施醫國手陰功陽報理昭然

代題賀延安李氏八十二卷

皇元七葉太平民八秩康寧見在身神理要教全五福
妙齡稔說孝雙親

曾封臂已父疾又
畝母目二載復明

桑榆門巷偏留景

蘭玉階庭更可人
遙想廊延萬家邑
誰如李氏一堂春

閑居叢稿卷四